

Inatsisartut suleriaasianni § 37 imm. 1 naapertorlugu Naalakkersuisunut apeqquq imaattoq matumuuna saqqummiuppara:

**Naalakkersuisunut apeqquteqaatit:**

1. Kuummiuni tunitsivik pillugu naalakkersuisut qanoq iliuseqarniarpat?
2. Aalisartut akiligassaminnik malinnaasinnaajunnaartussat naalakkersuisunit qanoq iliuseqarfiginiarneqarpat?
3. Fabrikki tunitsivituq tunumi piginnittuninngaaniit matuneqassappat naalakkersuisut qanoq iliuseqarnissaminnik pilersaaruteqarpat?
4. Angallammik tunitsivigineqarsinnaasumik tunumiisitsinissamik Naalakkersuisut pilersaaruteqarpat?
5. Angallat tunitsivigineqartussa q tikisineqassappat aalisakkat ullormut qassi tonsi minnerpaamik angallammut tunineqartassappat?

(Inatsisartuni ilaasortaq Mala Høy Kúko, Siumut)

**Tungavilersuut:**

Qaammat iluitsunngorpoq kuummiuni tunitsivituq matummalli. Taamanikkut ajarnartorsiutaasoq sarfamut atortuutit ilaatajortut paasineqareernikuvoq. Massakullu qangalili aqqiisoqareerneratigut ammarneqaqqissinnaagaluarluni tassa tunioraaneq aalisakkanik ingerlanneqaqqissinnaagaluarpoq. Kisiannili ammarneqaqqinngilaq paasisat Naalakkersuisut piginnittullu akunnerminni aqqiissutiginiagaat aqqinneqaqqinngimmat.

Ammarneqaqqinngippat tunutsivik kingunerisussaavaa aalisartut aallartittuarnikuugaluit kiisalu aamma angallatiminni motorinillu amuaavinnillu assigisaanullu akiligassallit kiisalu aamma illuminnut qullinullu sorpassuarnillu akiligassallit akiliisinnajunnaarlutit kommunimut ikioqqussummik saaffinnissuteqarnissaat. Arlallit qulliminni qamitaajumaarput, illuminni anisitaanissaminnik allagarsiumaarput, meerartallit kaalerumaarput. Ila sorpassuarnut akissaarullutik piniartut aalisartullu nunamiiginnalerumaarput.

Ullut suliffiusut qulit ingerlaneranni akineqarnissara naatsorsuutigaara.